



Sesida dals

18 d'avust 2026

Communitgà ils

19 d'avust 2026

Protocol nr.

572/2026

### **Dumonda Pfäffli**

concernent las entradas da taglia e la gulivaziun da las resursas da las 11 vischnancas da l'Engiadin'Ota

### **Resposta da la Regenza**

La Regenza renconuscha l'impurtanza da las vischnancas da l'Engiadin'Ota per la capaciad economica e la forza fiscala dal chantun. Il sistem da la gulivaziun da finanzas entaifer il chantun ha necessariamain per consequenza che las vischnancas cun bleras resursas sa participeschan substanzialmain a la gulivaziun da las resursas. La prelevaziun è dentant concepida uschia, ch'i dat vinavant impuls per l'agen svilup economic e per l'augment da la forza fiscala. I sto vegnir differenzià che la dependenza supponida qua na po betg valair per tut las 11 vischnancas da l'Engiadin'Ota, mabain ch'ella pertutga principalmain la vischnanca da San Murezzan. Ni las vischnancas cun bleras resursas tuttas ensemen ni la vischnanca da San Murezzan cun fitg bleras resursas mo suletta, na vegnan franadas tras la gulivaziun da finanzas. Quai demussan fitg bain ils resultats dals quints annuals dals ultims onns sco er, sa referind a quai, il svilup dals pes da taglia communal. La gulivaziun da finanzas na dat nagins fauss impuls ed è concepida en moda dinamica. In'eventuala reducziun dal potenzial da resursas sa resultass tant pli svelt en contribuziuns pli bassas. La Regenza observa cuntinuadamain il svilup da las entradas da taglia sco er eventualas midadas da las cundiziuns generalas. Ella rapporta plinavant regularmain davart l'effect da la gulivaziun da finanzas e propona adattaziuns en cas da basegn.

*Tar la dumonda 1:* Per l'onn da gestiun 2025 importa la cumpart da las 11 vischnancas da l'Engiadin'Ota vi dal total dals geners da taglia menziunads tut en tut var 20 % sin plaun chantunal. Tar la taglia sin las entradas vegnan generadas var 14 % da la taglia chantunala respectiva en las 11 vischnancas da l'Engiadin'Ota. Tar la taglia sin la facultad èn quai circa 27 %, tar la taglia sin las expensas circa 87 % e tar la taglia sin il gudogn tras la vendita da bains immobigliars èn quai circa 33 %.

*Tar la dumonda 2:* Na. Igl è evident che l'Engiadin'Ota resp. la vischnanca da San Murezzan presta la pli gronda cumpart da la finanziaziun orizzontala da la gulivaziun da las resursas. Or da quai n'è dentant betg da deducir in'effectiva dependenza da la finanziaziun. Il sistem solidaric da la gulivaziun da finanzas sto cuntanscher differents finamiras (cf. missiva tar il segund Rapport davart l'efficacità da la gulivaziun da

finanzas, carnet nr. 11/2025–2026, p. 743). Cun l'instrument dal rapport davart l'efficacitad po la Regenza reagir regularmain sin midadas essenzialas e proponer adattaziuns.

*Tar la dumonda 3:* La gestiun da las finanzas vegn fatga tenor differentes principis (legalitad, equiliber da las finanzas, spargnusadad, urgenza, rentabilitad, princip dal chaschunader sco er orientaziun a l'effect) e contribuescha ad ina politica da finanzas duraivla a lunga vista. Tenor la valor directiva da la politica da finanzas nr. 4 sto la grevezza fiscala restar uschè bassa sco pussaivel. La realisaziun da l'incumbensa Hohl concernent la distgargia fiscala da famiglias e persunas dal fatg n'ha betg mo gì per consequenza che differentas deducziuns fiscalas èn s'augmentadas, mabain er ch'ils pes da taglia da la taglia sin las entradas, sin la facultad ed a la funtauna èn sa sbassads per il 1. da schaner 2024 da 100 % sin 95 % e per il 1. da schaner 2026 sin 92 %. La Regenza s'engascha per mantegnair la taglia sin las expensas – ina funtauna d'entradas relevanta per l'Engiadin'Ota ed il chantun. Ultra da quai ha il chantun concedì ils ultims 20 onns garantias da promoziun da var 40 milliuns francs a l'Engiadin'Ota / regiun Malögia. Actualmain elavura il chantun la dumonda da l'interpresa d'infrastructura Piazza aviatica regiunala Samedan per in emprist federal e per ina contribuziun chantunala da mintgamai 6 milliuns francs per renovar la piazza aviatica regiunala a Samedan. Cun questas strategias duain vegnir segirads a lunga vista l'attractivitat ed il substrat fiscal dal chantun sco tal ed uschia er da las 11 vischnancas da l'Engiadin'Ota.

*Tar la dumonda 4:* La Regenza renviescha a la consultaziun currenta, tenor la quala ina taglia immobigliara chantunala speziala duai vegnir introducida, per ch'il chantun, las vischnancas e las baselgias possian cumpensar il minus d'entradas tar abitaziuns secundaras e survegnir uschia ina gronda part dal substrat fiscal. Quest project è fitg impurtant per l'Engiadin'Ota ch'è in dals gronds ed impurtants centers turistics dal chantun. Tar la taxaziun individuala vegni renvià a la resposta da la Regenza davart la dumonda da la fracziun dal Center concernent las consequenzas da l'imposiziun da taglia individuala per ils pajataglias (emprim sutsegnader Brunold) (conclus dals 15 da zercladur 2026 prot. nr. 432/2026). Ina stimaziun fidabla da las consequenzas è pir pussaivla il 2027.



Il president:

Martin Bühler

En num da la Regenza

Il chancelier:

Daniel Spadin